

Astrid Britten

Pronto trabou di mantencion di Biblioteca San Nicolas lo inicia

ORANJESTAD - Muy pronto Biblioteca San Nicolas lo wordo cera pa asina trabounan di mantencion por tuma luga. Por lo pronto esaki ta den funcion te ora cu haya sa cua compania di construccion lo ta encarga pa drecha e biblioteca.

Manera Biblioteca Nacional di Playa, esun di San Nicolas tambe tabata tin su actividadnan despues di merdia. Ainda nan ta habri, pero esaki no lo bay dura hopi pasobra no lo bay duro hopi cu kier bay cuminsa cu e trabounan di mantencion di Biblioteca San Nicolas, segun e directora Astrid Britten.

Awor aki ta yegando fin di aña y ta

bay hendenan di construccion cu ta bay cu vakantie. Funcionarionan di DOW tin e programa pa cuminsa traha riba e mantencion di e biblioteca. Sra. Britten ainda no a haya sa con largo e trabou di mantencion lo dura. "Pa puro casualidad mi a papia cu e funcionarionan di DOW, pero tanten cu mi no tin e y mi no sa ken ta e contratista cu a gana e bidding pa bay traha riba dje, e informacion ey na e momentonan aki mi no tin ainda," e directora ta indica Bon Dia Aruba.

Bus di biblioteca

Biblioteca tin su propio bus di buki cu sa bishita scolnan, pero na e momentonan aki tin un tiki problema cu esaki. E motibo ta bin cu e bus tin su añanan y hopi biaha nan tin e retonan

cu e parti di mantencion cu mester tuma luga tin biaha no ta esun mas miho. Tin biaha nan mester warda riba piesa, tin biaha cierto piesa ta gasta. Esun cu ta haci e mantencion di e bus pa biblioteca ta e personal di Arubus, e directora ta bisa Bon Dia Aruba. Esaki ta bin pa motibo cu na biblioteca, nan mes no tin e conocimiento con pa drecha un bus y esaki tin su retonan.

A puntra Sra. Britten si gobierno ta subsidia pa mantene e bus. E ta indica cu e bus ta parti di nan y nan ta un departamento di gobierno. Aki no tin ningun cambio of cu ta papia algo di subsidio.

E bus ta parti di pais Aruba, pero aworaki e tin su retonan tecnico pa cual e ta na garashi cerca Arubus. □

